



**Шухрат СИРОЖИДДИНОВ**  
филология фанлари доктори, профессор  
Ўзбекистон миллий университети ректори

## ЧЕТ ТИЛЛАРНИ ЎҚИТИШДА ЛИНГВОДИАКТИКА

Бугунги ахборот олами тасаввур қилиб бўлмас даражада онгу шууримизни эгаллаб бораётган бир шароитда халқларнинг маданий интеграцияси шиддат билан ўсаётганлигига табиий жараён деб қарасак нотўғри бўлмайди. Шу билан бирга глобаллашув даврида миллий ўзига хосликни сақлаб қолиш масаласи моддий ва номоддий буюк маданият ва дунё цивилизацияси тарихида алоҳида ўрин тутган халқларни ўйлантирувчи долзарб масалалардан бўлиб келмоқда. Чет тилларни чуқур ўрганган, дунё халқлари билан эркин муомала қила оладиган, ўз юрти, халқи, давлати манфаатларини юксак билим ва иқтидор билан химоя қилишга қодир мутахассисларгина бундай улкан глобал муаммоларни ечишга қодирдирлар.

Шунинг учун ҳам Ўзбекистонда чет тилларни ўргатиш соҳаси давлат ижтимоий сиёсатининг устувор йўналишларидан бирига айланган. Зеро, “бугун жаҳон ҳамжамиятидан ўзига муносиб ўрин эгаллашга интилаётган мамлакатимиз учун, чет эллик шерикларимиз билан ҳамжиҳатлика, ҳамкорликда буюк келажагиниқураётган ҳалқимиз учун хорижий тилларни мукаммал билишнинг аҳамиятини баҳолашнинг ҳожати йўқдир”<sup>1</sup>.

Ўзбекистон Республикаси Президенти Ислом Каримовнинг 2012 йил 10 декабрда қабул қилган “Чет тилларни ўрганиш тизимини янада такомиллаштириш чора-тадбирлари тўғрисида”ги ПҚ – 1875 сонли Қарори юқорида айтиб ўтилган давлат эътиборининг навбатдаги далолати бўлди. Ўтган давр ичida Ўзбекистондаги услубият ва педагогика илми соҳасида чет тилларни ўрганиш вазифаларига доир муаммовий изланишлар доираси бирмунча кенгайтирилди. Бу ўкув жараёнини оптималлаштиришдаги замонавий технологиялар, ўқитишида асосий янгиланиш стратегияси сифатида шахсга йўналтирилган инновацион технологияларнинг жорий этилиши, талабани(тил ўрганувчини) ўкув таълимоти марказига айлантириш, ўргатиш –

<sup>1</sup>Каримов И. Баркамол авлод – Ўзбекистон тараққиётининг пойдевори. Тошкент, 1998, 8-бет.

ўрганиш жараёнида тенг ҳамкорлик шароитини яратиш, лойиҳалар услуби, чет тил нутқи ва уни шакллантиришнинг турли йўлларини тезкор ўрганишнинг оптимал услубларини танлаш, тил ўрганишнинг интерактив методлари, лингвосоциомаданий метод, ахборот педтехнологиялари, тобора ривожланиб бораётган педтехнологиялар, электрон (мультимедиа) ўқув қўлланмалари ва электрон луғатлар, аудиоматнинг коммуникатив адекватлиги, интернетдан фойдаланишнинг базавий имкониятлари ва ҳоказо жараёнларни ўз ичига олади.

Бугунги кунда узлуксиз таълим тизимининг чет тилларни ўрганишнинг давлат таълим стандартлари ишлаб чиқилди. Британия кенгаши эксперtlари ҳамкорлигидаги “Чет тилларни билишнинг умумевропа компетенцияси: ўрганиш, ўқитиш ва баҳолаш (CEFR)”га асосланган ҳолда чет тиллар бўйича узлуксиз таълим тизимининг Давлат таълим стандартларини такомиллаштириш устида иш олиб борилди. Яратилган ДТСларни халқаро нормаларва чет тилларни эгаллашнинг даражалари дунё тажрибасига мослиги тўғрисида Британия кенгаши ва британиялик эксперtlарнинг хulosаси олинди. Натижада Ўзбекистон Республикаси Вазирлар Маҳкамасининг 2013 йил 8 майдаги 124-сон қарори билан узлуксиз таълим тизимининг чет тиллар бўйича давлат таълим стандарти тасдиқланди. Олий таълим бакалавриат йўналишлари учун чет тили фани бўйича 250 аудитория соатлари ҳажмига мўлжалланган намунавий ўқув дастуришлаб чиқилди. Намунавий дастурни тайёрлашда таълим турларидаги узвийлик ва узлуксизлик шартлари эътиборга олинди, Европа стандартларида белгиланган тилларни билиш даражасига кўйилганталаблар киритилди. Муалифларга эса, “Талаба китоби”, “Ўқитувчи китоби” ва “Машқлар тўплами”ни тузишда умумевропа стандартларига мос равишда тил ўрганишни таъминлаш, коммуникативликка йўналтириш, миллий йўналтирилган мазмунни сингдириш, шунингдек, аудио ва видео материалларни илова қилиш ҳамда электрон дарсликларни яратиш вазифалари белгилаб берилди.

Шуни алоҳида таъкидлаш ўринлики, чет тилларни билиш турли хориж маданиятлари билан танишиш, ўзаро мулоқот орқали халқлар, давлатлар, маданиятларнинг яқинлашувини таъминлайди. Шу жиҳатдан тил ўрганувчиларда маданиятлараро компетенция малакасини шакллантириш мухим босқич ҳисобланади. Бу эса, чет тилни мутахассислик сифатида ўқитаётган олий таълим муассасаларига маданиятлараро даражада мулоқот қилишга қодир “хар тарафламамаданияти, кенг фикрли тил сохиби” ни шакллантиришни бош вазифа қилиб қўяди. Ўқув жараёнига жорий этилиши лозим бўлган ушбу инновацион дидактика амалиёти ўрганувчига нафақат чет

тил нутқ имкониятлари ва фазилатлари, маданияти қирралари билан, шунингдек, тенг равиша ўз маданияти ва маънавий мероси билан танишириб бориш шароитини яратади. Давлатимиз раҳбарининг “чет тилларни ўрганиш, минбаъд она тилини эсдан чиқариш ҳисобига бўлмаслиги лозим”<sup>2</sup> ва “ўзбек боласига чет тилларнинг ажиб дунёсига бемалол кириши учун имкониятларни тўлик очиб бериш керак”<sup>3</sup>лиги ҳақидаги қўрсатмалари чет тилларни ўқитиши жараёнига миллый йўналтирилган матнлардан кенг фойдаланишини долзарб масалага айлантиради.

Шу асосда маданиятлараро мулоқот малакасини шакллантириш энг аввало маданият матнларига асослаган ўқитишининг оптималь модели яратилишини тақозо этади. Тил ўқитишида коммуникатив ёндашувнинг муҳимлиги унга асос бўлади. Унинг доирасида тил ўзининг фаолият муҳити билан ўзаро боғлиқликда ўрганилади. Бунда коммуникация иштирокчилари, уларнинг ижтимоий ўрни, мулоқот шартлари ва коммуникация турлари эътиборга олинган бўлади. Мулоқот инсон фаолиятининг асосиниташкил этиб, уни ҳаракатга чорловчи рафбат, олам ҳақидаги тасаввур ва тафаккурининг асоси, инсонлар ўртасида турли самарали ҳамкорлик қўринишларига замин яратади.

Албатта, маданиятлараромулоқот компетенцияси ўз она тили ва чет тилдамулоқот маданиятини такомиллаштиришни, сухбат қуриш технологиясига ўрганиш, сухбатдошга ҳурмат билан қарашга ҳам ўз навбатида мажбур қиласди.

Нутқ компетенцияси сўзловчи ва тингловчидан мулоқот қоидалари бўйича билимларга эгаликни, мулоқот қонуниятлари, маданиятлараро коммуникация хусусиятларини ҳисобга олган ҳолда ўз она тилида мулоқот стратегиясини белгилаш иқтидори бўлишини талаб қиласди. Шу нуқтаи назардан, жамият томонидан қўйилган ўзига хос янги ижтимоий буюртма шароитида талабанинг коммуникатив компетенциясини шакллантириш учун чет тилни маданиятлараро коммуникация воситаси сифатида ўргатишида қуйидаги: нутқий коммуникация, нутқий таъсир, нутқий мулоқот стратегия ва тактикаси, матн тузишда экспликациянинг гендер лисоний воситалари, нутқ малакаси, маданиятлараро коммуникация қоидалари ва бошқа аспектларни ҳисобга олиш жуда муҳим.

Чет тилни ўрганишда ахборотни тушуниш, кодлашган ахборотни тилнинг белгилар тизимида идрок этиш муҳим ўрин тутади. Чет тилни мутахассислик сифатида ўрганиш маданиятга оид матнларни идрок этиш

<sup>2</sup>Каримов И. Баркамол авлод – Ўзбекистон тараққиётининг пойдевори. Тошкент, 1998, 9-бет.

<sup>3</sup>Ўша асар.

спецификаси, биринчи навбатда, вербал ва новербал бадиий образларни идрок этиш билан узвий боғлиқ. Чунки айнан уларда нафакат атроф-олам воқелигининг бутун турфа хиллиги намоён бўлади, балки, шунингдек, у ёки бу халқ, элатнинг маданий даврлари ҳақида ҳам тасаввур пайдо бўлади ва дунёқараш шаклланади.

Мулоқот маҳоратига фақат муайян ҳажмдаги лисоний материалларни ўзлаштириш ва коммуникацияга дахлдор машқларни бажариш орқали эгалланадиган дастлабки нутқий малака ва кўникмалар асосида эришиш мумкин. Бу машқлар имитацион, трансформацион, аналитик ва бошқа кўринишларда бўлиши мумкин. Улар лексик-грамматик характерга эга. Мазкур машқлар тизими шартли равишда мулоқотни ўрганишнинг илк босқичини ташкил этади. Бу талабалардан муайян ақлий мушоҳада ва вақтни талаб қиласди. Бироқ ушбу босқични ўтмасдан бевосита коммуниктив машқлари ва ўқув мулоқоти жараёнида иштирок этишнинг иложи йўқ.

Замонавий услубиётда коммуникатив йўналиш чет тилни ўрганишнинг оптимал варианти ҳисобланади. Айни шу услуг чет тилни мулоқот воситасида эгаллашнинг энг қисқа йўлидир. Чет тилда мулоқот қилишни ўрганиш тилни эгаллашга амалий йўналтирилганлиги билан коммуникатив машқларнинг бутун тизимини белгилаб беради, хусусан, нутқ амалиёт мулоқоти доирасида, мулоқот шаклида ўтказилади.

Таълимнинг коммуникатив йўналтирилганлиги тил назарияси (грамматика)ни ўрганишни инкор этмайди. Коммуникатив машқлар муайян тил материалини матн-намуналар, топшириқ ва тавсиялар кўринишида ўзлаштиришга қаратилган. Албатта, бу ерда лексик-грамматик назариянинг ҳажми ва ўрнини оптимал равишда аниқлаб олиш муҳим ва у ўқув жараёнининг турли босқичларида турлича бўлади. Агар ўрганувчиларнинг ўзи томонидан машқларнинг коммуникатив характеристери етарлича англаш олинса, яъни улар чет тилда тўғри гапиришва ёзиш учун сўзлар ҳамда уларнинг шакллари, сўз бирикмаларива ифодаларнинг тузилиши, лексик ва грамматик материалларни билиш, орфографик ва пунктацион қоидаларни ёд олиш қанчалик муҳим эканлигини тушуниб етсалар, шунингдек, ўқилган ва тингланган матн мазмунини тўғри англасалар ва чет тил машғулотларида ўтилаётган барча дарслар нутқни ўстириш йўлида зарурий тайёргарлик босқичи эканлигига ишонч ҳосил қилсалар интенсив равишда мулоқотга йўналтирилган машқлар тизими катта муваффақият келтиради.

Чет тилда мулоқот қилишни фаоллаштириш йўлидаги барча тайёргарлик ишлари тил ўрганиш жараёнида катта ўрин тутадиган ўқув матнларидан самарали фойдаланишни кўзда тутади. Албатта, улар ўз асосий

кўрсаткичлари бўлмиш лексик ва фразеологик таркиби, грамматик материалнинг бойлиги, мавзу йўналиши, баён фабуласи, композиция ва стилистика, семантик-мантиқий доминантларни ифодалашдаги ўзига хослик жиҳатидан ўзаро фарқланиб турадилар. Шунинг учун ҳам ўқув матнларини танлаш ўқитиш босқичлари билан боғлиқ равища олиб борилиши лозим. Албатта, ўқув матнларини тил материалини тўлиқ ўзлаштириш талабларига мувофиқ ишлаб чиқишида олдимиизда лингвоуслубиймуаммо кўндаланг бўлиши турган гап. Уни ҳал қилишда танланадиган матнларни мослаштириш йўлларини топиш зарур бўлади. Ўқув материалини ўзлаштиришни енгиллаштиришга қаратилган усуллар тизими адаптация истилоҳи орқали бизга маълум. У матннинг кимга мўлжалланганлигига қараб турлича бўлади. Хусусан, норматив дарсликдаги матнларнинг адаптацияси, уй ва индивидуал ўқиш учун мўлжалланган матнлар тўпламлари адаптацияси турлича бўлади. Ўқув матнлари турфа хиллигидан келиб чиқиб адаптация усулларини қўриб чиқиши чоғида матнларни тузиш ва ишлов беришнинг аспектли йўналтирилган бўлишига эътибор қаратиш лозим бўлади. Баъзи ҳолларда, адаптация айрим тил аспектлари, масалан, изоҳли интерпретацияни камайтириш билан чегараланиши мумкин. Конкрет тил аспекти билан боғлиқ равища матнларнинг ўқув талқини турли алоҳида, масалан, лексик-семантиқ, фразеологик, грамматик, фонетик-орфографик, каби даражаларда олиб борилиши лозим. Шу жараёнда тарихий-этимологик, маънавий-маърифий ва энциклопедик характердаги ахборотларга алоҳида эътибор қаратилиши керак. Ўқитишнинг кейинги юқори босқичларида бадиий матннинг стилистик-маъновий талқинига алоҳида эътибор қаратган ҳолда кўпроқ лексик-фразеологик воситаларни изоҳлаб боришга, улардаги муаллиф ижодий методининг ўзига хослик томонларини очиб боришга интилиш мақсадга мувофиқдир.

Мамлакатимиз олий таълим муассасаларида таълим йўналишларидан қатъи назар, талабаларнинг чет тилни мукаммал ўрганишлари учун қулай оптимал шароитлар яратилмоқда. Ўқитувчилар талабаларнинг билим, кўникум ва малакаларини янада оширишда давлат сиёсатининг устувор йўналишларидан бири сифатида таълим сифатини таъминлаш ва баркамол шахсни тарбиялаш каби умуммиллий вазифани бажариш йўлидаги мажбуриятлари доирасида жиддий изланишлар олиб бормоқдалар. Бунга мисол қилиб Президентнинг “Чет тилларни ўрганиш тизимини янада такомиллаштириш чора-тадбирлари тўғрисида”ги ПҚ – 1875 сонли Қарори бўйича Олий ва ўрта маҳсус таълим вазирлиги, Халқ таълими вазирлиги ва уларнинг асосий базавий муассасалари бўлмиш Ўзбекистон давлатжаҳон

тиллари университети ва Самарқанд давлат чет тиллар институтида ишлаб чиқилаётган турли ўқув дастурлари, услугий кўлланма ва ўқитиш методикаси, чет тилнинг алоҳида аспектларини ўқитиш технологияларини кўрсатиш мумкин.

Машғулотнинг асосий тури – аудитория машғулотлари бўлиб, ўқув соатларининг кўпчилик қисмини ташкил қиласди. Айни шу аудитория машғулотларида ўқитувчи талабаларнинг аспектлар (фонетик, лексик, грамматик) ва коммуникатив малакасини ривожлантиради, уларнинг лексикон ва чет тилда мулоқот қилиш маданиятини шакллантиради. Ўзбекистонда жорий этилаётган дастур ва ўқув ишланмаларининг чет тилни ўқитишнинг янги Модуль дастурлари талаблари асосида яратилгани ва яратилаётгани талабаларнинг профессионал билим, малака ва қўнималарини шакллантириши билан бирга матнда акс этган барча миллий-маъновий йўналтирилган ахборотни ўзлаштиришига катта имконият беради. Матнларни тузишда тезаурус – тематик ёндашув бу масаланинг ечимида катта ўрин тутади. Ҳатто нофилологик йўналишдаги олий таълим муассасасида таҳсил олаётган талаба ҳам чет тил дарсларида лингвистик билимлар билан бирга ўз соҳасидан узоқ бўлмаган тарихий, адабий, этнографик ва ҳоказо маълумотларни тезаурус – тематик ёндашув негизида тайёрланган матнни ўрганиш жараёнида ўзлаштириб олади. Тажриба шуни кўрсатадики, тезаурус – тематик цикллар асосида тайёрланган курслар услубий жиҳатдан ўзини оқлаб, юқори даражада самарадорликка, талаба дунёқарашининг, коммуникатив компетенцияси билан биргаликда миллий ғуур ва ифтихорининг ошишига сабаб бўлмоқда.

Шуни ҳам айтиб ўтиш зарурки, тезаурус – тематик цикллар учун маҳсус матнларнишлаб чиқиши бўйича бугунги кунда Ўзбекистон Давлат Жаҳон тиллари университети ва Самарқанд давлат чет тиллар институтида амалий ишлар олиб борилмоқда. Хусусан, 2012 йили ЎзДЖУ профессор-ўқитувчилари ва магистрлари ҳамкорлигида ўзбек адабиётининг нодир намуналаридан бир қанча тарихий ва замонавий мавзулардаги романлар инглиз тилига таржима қилинди. 2013 йили элликка яқин ўзбек адиларини ҳикояларини бевосита инглиз тилига таржима қилиш ишлари бошланди ва 2014 йил ниҳоясигача тугалланиши режалаштирилган. Самарқанд давлат чет тиллар институтида ёш таржимонлар мактаби ташкил этилиб, Алишер Навоий асарларини инглиз тилига таржима қилиш ишлари йўлга қўйилди. Бу лойиҳаларнинг натижасида маҳсус матнлар тўпламлари яратиш ва улардан талабаларнинг коммуникатив компетенциясини шакллантиришга йўналтирилган матнлар билан бирга талабаларнинг ўз халқи адабиёти, тарихи, маънавий мероси ҳақида етарли тасаввур ҳосил қилишига имкон яратилади.